

QUÆSTIO MEDICA,

Quodlibetariis disputationibus manè discutienda in Scholis Medicorum, die Jovis octavâ Januarii 1711.

M. ANTONIO GEOFFROY, Doctore Medico, Præside.

An, motus cordis ab aëre?

I.

COR functionum nobilitate, præstantissimum viscus. Sedes ejus medio in thorace : unde sanguinem, quo partes vivunt, in omnes dispensat ; providum adeò, ut ne minima eo salubri liquore defraudetur, aut rore hujus recreata non floreat, saturata non augetur. Ordiantur ab ipso canales, quibus vel in remotissimos corporis recessus opes suas effundat. Alii pares pretiosas reliquias excipiunt, in sinum ejus reportaturi, vitæ caractere, quo, lustratis partibus, orbæ redibant, denuò donandas. Miraculum illud solo motu absolvitur. Cordi etenim cum tantæ sint partes, sapienter cautum fuit, ut primum in corpore animali viveret, ultimum moreretur. Hinc, dum volatilior aura seminis per poros uteri in sanguinem admissa, & circuitus lege ad ovaria usque eversa, tenellum embryonis rudimentum afflat, corculum ejus primum impetit, ac exsuscitat. Ineunte circuitu, homo fit ; pereunte, interimitur. Hactenus incassum curiosi naturæ indagatores motum cordis rimari conati sunt. Est in sistematis illorum semper quod desideres. Flamma vitalis, calor insitus, splendida verba. Figmentum, cor à membranis cerebri motum suum mutuari : his sublati, imò toto cerebro, illæso cerebello viginti aut triginta horarum spatio cor pulsare miraberis. Ex æquò dura & pia mater spiritus adigunt, nulloque discrimine in omnes nervorum propagines. Pereat ergò necesse est discrimen motuum voluntariorum ab involuntariis. Non sanguini, non spiritibus, motum suum referre cor, conficitur ; avulso è corpore ranæ aut viperæ, continuatur motus, in machinâ Boylianâ feriat, exhausto aëre : reviviscit in libero & patenti. Quò te veritas, angustia undique. Duplex cordis motus ; activus alter, systole : alter passivus, diastole. Prior cordi proprius, sed erumpit tantum ex occasione posterioris.

II.

TOTA cordis coagmentatio ipsum musculus evincit. Figurâ refert pyramidem inversam. Pars superior, quæ lata est, dicitur basis ; inferior, quæ angusta, conus, vel cuspis. Substantia, pro maxima parte, caro proprie dicta, & duplici potissimum fibrarum tractu deducta : harum aliæ à basi cordis sinistrorsum spirali ductu descendunt ; aliæ verò contrario situ gaudent, & à cono dextrorsum eodem ritu ad basim excurrunt. Quibusdam visum est hunc dupli-

cem fibrarum ordinem unico comprehendere, quarum origo à basi, terminus idem. Omnibus probatur nullas alias in toto corpore reperiri contextu firmiores. Duæ præterea insignes cavitates cordi insculptæ sunt; ventriculos nuncupant. In has numero pares hiant alia, & auriculæ audiunt: harum & illarum structura eadem, usus non abfimilis, sed alternus. Dum contrahuntur auriculæ, sanguinem in ventriculos evomunt, è quibus dum pellitur, novus ad auricularum sinum advehitur. Ex eo autem reciproco motu tota systoles & diastoles ratio repetatur. In hac, fluidi ruentis impetu ampliatur cor, conus à basi repedit, fibræ ex obliquis & contortis rectæ fiunt; verbo: externis vincuntur viribus; in illâ, propriâ virtute & figuratione restituntur.

III.

A E R I, in corpus nostrum, unica via: ad exitum, mille patent. Alternante inspiratione quid aëris sanguini afflari, ipsique aut nitro aëreo, floridiorem, quo saturatur ille in pulmonibus, colorem adscribere, ingeniosum commentum. Nec felicius res ipsi cessura, si viam molitur per cutis emunctoria: utrinque aditum prohibet indefinens perspirationis effluvium. Hoc ita factum putes, quod & hunc & quælibet corpora in sanguinem immediatè infundere impunè non liceat. Insufflato aëre in venam jugularem canis, illicò perit animal: similis ipsum excipit exitus, si lac aut spiritus vini immittantur. Adeo inconcussum stat corpus ullum, innocuum quamvis, absquè gravi noxâ, sanguini affundi non posse, præviâ præparatione non elaboratum. Illud tantæ molis opus ventriculo creditum. Quidquid solidum vel fluidum os ingreditur, unâ comes subit aër, unâ in stomachi cavitatem devolvitur, non prius indè egressurus, quàm alimenta in albicantem pollinem redacta, viam per pilorum affectent: hanc ipse simul premit, perquè vasa lactea, perquè ductum thorachicum tenuissimæ ipsius particulæ chylum in sanguinem usquè prosequuntur. Quâ portione sanguis cuilibet corporis humani parti dispertitur, pari quoque socius aër distribuitur. Variæ circa figuram particularum prodire sententiæ: scopum digito tangunt, qui aërem infinitis lamellis in spiram contortis conflatum fingunt. Omnes illæ porro non uniusmodi sunt, sed diversæ molis. Frigore densantur, rarefiunt calore, unicæ inter fluida elatere donantur, ipsisque omnium corporum elaterium referendum. Omnibus in fluidis innatant, illorumque fluiditatem foveant: in solidis inclusas & quidem compressas latitare, non est fidei absolum. Dum rarefiunt, & à vinculis, quibus irretiebantur, liberæ erumpunt, corporum, quibus intercluduntur, dilatationem promoveant. Hinc summa vis ac energia pulveris pyrii accensî: hinc motus subterranei, eorumque stupendi effectus. Pondere demum aëris & vi elasticâ innumera patrantur miracula. Utrumque omnis fermentationis parens. Dum acida summo apice alkalium poros proprio fluidi motu subintrant, aëris gravitas, aut vis elastica ulterius pellit

& intus adigit, donec, disruptis pororum parietibus, in minimas partes diffingantur ipsa alkalia: non tamen sine bullularum aërearum erup-tione & incallesceniâ. Primum semper deprehenditur; secundum, non perpetuæ veritatis. Hic autem motus, si uspiam valet, in muta-tione, quam subeunt alimenta in ventriculo, & chylus in sanguine, po-tissimum obtinet.

I V.

PONDERE & elatere simul junctis, aut utriusvis ope, pleraque gignit aër, quæ vulgò ipsi adscribuntur, phænomena. Primum ubi deficit, alterum sufficitur & satis est. In aëre libero aut conclu-so intra parietes cubiculi, ad æquam altitudinem sustinetur mer-curius; ad eandem evehuntur liquores. Elatere solo cordis systole ab-solvitur; pondus parùm aut nihil confert. Hanc concipe legem. Inest non pauca aëris copia in sanguine, & quidem compressi: nec deest in tubulis fibrarum muscularium. Utrumque clarum fit experimentis Boyleianis. Sanguinem humanum, sive carnes in machinâ pneumaticâ si reposueris, educto aëre, protinùs hunc & illas in magnam molem efferri miraberis. Hujus inflationis authorem censeas aërem intùs lati-tantem. Hic, ubi paululùm remittitur aëris exterioris compressio & pondus, sensim rarefit in omnem loci differentiam. Sanguis ergò, & particulæ aëreæ unà per vasa volutantur, unà ventriculis cordis alla-buntur. Tùm ibi liberæ factæ à complexu particularum, quæ ferment-atione in minima frustula dissiliere, rarefiunt & expanduntur; sup-petias venit pondus sanguinis & velocitas, quâ utrumque fluidum ex auriculis propellitur. Illæ simul consociatæ vires, cavitates cordis hinc indè ampliant, conum à basi amoveant, vimque & pressum inferunt particulis aëreis, quæ in fibris spiralibus incarcerationantur. Hæ premi impatientes, in ipso puncto quietis, quo velocitas sanguinis, quæ vera est percussio-species, perimitur, elatere factò, fibras in nativam fi-guram, contortas scilicet restitunt: illæ tùm ad pristinum statum, pa-ri impetu, quo fuerant elongatæ, redeunt, & contenta quæque in tha-lamis cordis, quâ data porta, abigunt. Neque ratio huic mechanicæ refragatur, imò comprobatur experienciâ; palam fit enim cor-pora elastica, si quâ vi externâ flectantur aut premantur, non solum restitui, verùm ultrâ punctum quietis resilire, prout major vel minor vis compressionis, firmior vel rarior corporum contextus, & ductilitas. Non absimili lege cor extractum è corpore viperæ pulsare dices. Tùm velocitate aëris irruentis, tùm cordis calore, quo rarefcit ille & expanditur, patentiores fiunt ventriculi & diastole perficitur. Hanc proximè sequitur systole elatere aëris in fibris muscularibus inclusi sequè restituentis. Uterque tamen motus sensim elanguescit, imò pe-nitùs evanescit, idque citiùs hyberno tempore, tardiùs æstivo.

V.

EJUS est itaque virtutis aër, ut cor semel ingressus, particula-rum suarum expansione, ejus ventriculos ampliet, fibras elonget

spirales, illæque aëris, quò interiùs saturantur, elatere restituantur. Hi motus alternè sibi succedunt: ità tamen ut non priùs unquam constringi cordi contingat, quam prævia extiterit ejusdem ventriculorum dilatatio. Hæc si crebra, frequens pariter cor feriet costas. Celeritatem pulsûs in febrili excandescentiâ non aliundè repetas, quàm ab intensiori sanguinis fermentatione. Dùm enim ille intra vasa furit, quò datur aditus, pleno rapitur flumine. Hujus rei adumbrationem exhibent nobis Chymici, permixtis invicem duobus fluidis diversæ indolis, repositisque in *matratio* oblongi colli: excitatâ fermentatione, liquor totam vasî longitudinem celeriter emensus, cum impetu spumofus foràs prorumpit. Ne existimes tamen, quò plures particulæ aëreæ intra sanguinem recondentur, eò celeriores futurum illius motum; requiritur præterea certa quædam partium luxuries, luctæ concipiendæ idonearum. Patet illud in longa jejunia passis, quorum pulsus vix prementes digitos repellit: verùm post cibos assumptos, viribus resectum validiùs illum intendi testes erunt iidem digiti. Chylo etenim sanguini affuso, utriusque liquoris particulæ novi fermentationis pabuli præsentiam agnoscunt, adeout, quidquid sanguinis incitamentum, illud & cordis. In hac porro hypothefi non ita operosum eruere, cur resectis nervis cardiacis, nihilominùs cor alternis diastoles & systoles motibus exerceatur, quippè quod spirituum animalium adminiculis non indigeat. Hi sanè desiderantur in primis, quas edit embryonis corculum, pulsationibus, cùm non priùs cudi incipiant in glandulis cerebri, quàm sanguis à matre ad fœtum, & à fœtûs corde ad eas appulerit. Iis instructus maternus sanguis illius machinulam ingreditur, quæ ad diastolen perficiendam requiruntur. In fibris verò spiralibus præviè deposuit unâ cum liquoribus, quibus adolevit fœtûs rudimentum, particulas aëreas, ut quarum auxiliis subsequeretur systole.

- *Ergò motus cordis ab aëre.*

Domini Doctores disputaturi.

M. Joannes Deplney Peschard. M. Petrus Azevedo.

M. Nicolaus Brunel de la Caverliere, Medicus Regis ordinarius.

M. Philippus Fontaine.

M. Joannes Herment, Medicus Regis ordinarius.

M. Joannes Baptista Doye.

M. Antonius Pepin, Scholarum Professor.

M. Stephanus Francisc. Geofroy, Regia scientiarum Academia Parisiensis, Regiaque societatis Londinensis socius & regius Professor.

M. Urbanus Leaulié.

Proponebat Parisiis HENRICUS BESNIER Parisinus, Baccalaureus Medicus. A. R. S. H. 1711.

Apud viduam Francisci Muguet Typographi Regis. 1711.